



INTRODUCZIUN

DA FLURINA CAVEGN-TOMASCHETT

Duront igl entir temps pascal ei ina part ord ils Fatgs dils apostels previda sco emprema lecziun dil survetsch divin dalla dumengia. Quei ei il sulet temps el ciclus annual, nua che texts ord il Niev Testament vegnan risguardai sco emprema lecziun. Il cudisch biblic raquenta oravontut dils fatgs dils apostels Pieder e Gion e dalla missiun da sogn Paul.

En la lecziun da questa dumengia vegn Pieder a plaid. El plidenta il pievel israelit, pia ils Gadius. Pieder vul gudignar e perschuer ses auditurs per «la caussa Jesus Kristus». El fa bein renfatschas al pievel d'Israel dad haver tradiu e snegau Jesus. Lur cuolpa vegn denton mitigada entras il fatg, ch'il plan da Diu ei serealisaus entras lur agir. Dieus veva numnadamein annunziau ch'il Messias vegni a pitir. Pieder tschenta aschia Jesus Kristus en la tradiziun dil Veder Testament, sin il fundament dils Gadius, dils babuns (Abraham, Isac e Jacob) e dils profets. El vul perschuer ils Gadius da suandar Jesus Kristus, quel che Dieus ha buca schau ella mort.

1. LECZIUN

Fatgs 3,13–15.17–19

Lez dis ha Pieder detg al pievel: Il Diu d'Abraham, d'Isac e da Jacob, il Diu da nos perdavons ha glorificau siu fumeagl° Jesus che vus veis tradiu e snegau avon Pilatus, cu lez era decidius da dar liber el. Vus denton veis snegau il Sogn° e Gest° e pretendiu ch'in assassin vegni daus liber. Igl autur dalla veta° veis vus mazzau, Dieus denton ha leventau el dils morts: Da quei essan nus perdetgas.

Ed uss, mes frars, jeu sai: Vus veis fatg quei ord ignoranza, sco vos menaders. Dieus denton ha aschia schau secumplenir quei ch'el ha annunziau ordavon tras la bucca da tut ils profets: Che siu Kristus vegni a pitir. Sche seconverti e fagei penetienzia, per che vos puccaus vegnien annullai.

◦ las quater expressiuns marca-das cheu ein cristian-giudaicas e serefereschan sin Jesus